

无漏之智。此名道智。云何盡智。謂自遍了知苦。自知斷集。自知證滅。自知修道。以爲其因。知見覺慧了知分明現前證得。此名盡智。云何无生智。謂自遍了知諸苦。故更无可知之智。自斷集。故更无可斷之智。自證滅。故更無可證之智。自脩道。故更無可脩之智。以爲其因。知見覺慧了知分明現前證得。此名无生智。言見者。雖則彼智亦是其見。亦復有見非卽是智。從現觀邊所生八忍。謂知苦法忍。知苦隨類忍。知集法忍。知集隨類忍。知滅法忍。知滅隨類忍。知道法忍。知道隨類忍。故說名見。言所有現觀者。卽彼知見亦是現觀。是故說爲現觀。

○云何爲得。謂諸法所獲。云何无想等至。謂已離遍淨貪未離上貪。由出離想作意爲先。心心法滅爲性。云何滅盡等至。謂已離无所有處貪。由止息想作意爲先。心心法滅爲性。云何無想所有。謂生无想。有情天中心心法滅爲性。云何命根。謂三界壽。云何衆同